



La staziun da la funiculara Kalktrittli: entamez il Tödi cun sia chapitscha da naiv, sanester il Selbsanft.


FOTOS C. CADRUVI

Sur il Kistenpass

Las duas attracziuns da questa tura èn il Muttsee ed il Limmernsee

DA CLAUDIA CADRUVI / ANR

■ **Bell'aura. Dus dis liber. N'avair nagin sturnizi.** Quai èn las cundiziuns per la tura sur il Lembra. Ina redactura e sia figlia èn sa messas sin viadi. Da Ziegelbrücke fin Linthal cun tren. Da Linthal fin Tierfed cun taxi. Da Tierfed sin il Kalktrittli cun la funiculara. Lura lain guardar, sch'ils chalzers da muntogna valan insatge? Nus essan en duas. La figlia è prompta d'accompanyar la mamma che fa redacziun sin viadi. Persula n'avess la redactura probabel betg gughegià dad ir sur il Lembra (Kistenpass). En duas plitost anc. Uschia pon ins sa lamentar, sch'ins na po betg pli, e po far curaschi ina a l'otra.



Tessaglia

Aura magnifica. Extra per nus. Da la staziun dal Kalktrittli han ins ina bellezza vista sin il Tödi. Dasperas varga il Selbsanft en il tschiel blau. Davent da qua pudessan nus ir la ruta tras in tunnel da trais kilometers lunghezza. El maina tar il Limmernsee.

Nus prendain dentant la senda che va ordenturn. En quella bell'aura! Ma era perquai che la mamma ha in zichel tema da tunnels. Quai na di ella dentant betg a la figlia.

Tessaglia. Las spundas da Glaruna n'enconuschan nagina remischun. Per fortuna n'avainsa nagin sturnizi, uschi pudessan nus gist sa manar e turnar



L'um crap dal Muttenwändli: En il lontan ves'ins il Muot da Rubi (Kistenstock), en la profunditad il Limmernsee.

a chasa. La plievgia da la notg passada è era sientada. I n'è nagin privel da sa glischnar.

La muntanera

Quant lunsch èsi anc? Lunsch n'èsi betg. Ma i va ensi. E gliez va halt vess. Suentar in'ura vainsa dumagnà il Kalktrittli. Il mender toc fiss fatg. Sin la carta dal Tödi (1193) è quest tschancun inditgà cun in fin ziczac. Faschaisa pia la pausa da mezdi e giudain la vista. Las paraisd-crap van agrad enagiu e tradeschan cun sias undas in chapitel da l'istorgia da la furnaziun da las Alps.

Empè da guardar per las gripa, preferescha la matta da far in cupid. Ma uss enavant. Suentar paucs pass essan nus en l'alp Nüschen. Là pasculescha ina muntanera da nursas. Igl è nursas che vegnan da la Surselva e passentan la stad en questa miaivla foppa glarunaisa. Quatter nursas han la pazienza da star model per dus maletgs, ma cura che la fotografa s'avischina, van ellas per lur fatg.

Limmernsee

Uss èsi puspè da restar zai per in'urella. Il Muttenwändli è pli auts che la finiziun da ses num fa parair. Cun tegnair a bass il chau e far pass pitschens surmunt'ins era quel obstachel. Schizunt la mattatscha tascha.

Tuttenina. Tge surpraisa. Vesas giu là la chamona dal Muttsee? I n'è betg pli lunsch. Questa buccada pudainsa senza pausa.

Sin il Muttenkopf, ves'ins lunsch enturn. Il Muot da Rubi (Kistenstockli) salida dal lontan. Ed i va 700 meters da la rusna enagiu. Giuaden là è il mir da fermada dal Limmernsee. Il lai s'extenda trais kilometers vers il glatscher dal Biferten. El vegn spisgentà cun aua da la regiun tranter il pass da Pigniu ed il Klausen.

Pestgar sin 2500 meters

Futsch. En la chamona stuainsa l'emprim ruassar. Da tschaina essan nus puspè fit. Cler, sch'i dat schuppa, macaruns d'alp e buglia da maila. La chamona è plaina. Tuttina hai num ch'ina gruppa da 33 personas ch'era s'annunziada na saja betg vegnida. Sa nua che quella gliעד avess gi plaz?

Trais rundas «chau Sep» epi dabot a letg avant che quels che runtgan sa durmentan.

L'otra damaun pretendan tuts ch'els na hajan l'entira notg betg durmi. Nus duas avain durmi prima ed essan pront per la segunda etapa. Avant partir anc ina baterlada cun il pestgader dal Muttsee.

Tge? I dat peschs en quest lai? Quel è

gea schelà schizunt la stad! «Cler ch'i dat peschs. Ina massa. L'onni passà hai jau tratg da quels apparats ord il lai.» Il pestgader mussa cun ses mauns ina lunghezza d'in mez meter. Nus faschain sco sche nus cartessan senz'auto. Il pestgader cuntinuescha: Il Muttsee haja ina profunditad da 40 meters. L'uniun da pestgaders dal Muttsee mettia mintg'onn ora litgivas canadaisas. Ma uss haja quai blers peschs gronds en il lai. Lezs maglian ils pitschens.

Il segund di

Dal Muttsee fin tar il Lembra vai successiv siadora tras blaisas da crap. Ins va tgunsch. Curt avant il Lembra datti perfin anc restauraziun. En la chamona dal Kistenpass survegn ins schuppa, Wienerlis e café. Nus n'avessan gnanca stuv pachetar en tantas servlas.

La «Kistenpasshütte» sa chatta sin il pli aut punct da nossa tura, sin 2714 meters sur mar.

Pli baud era quai in post da guardia da l'armada. La secziun da Winterthur dal CAS ha fatg ordlonder ina tegia cun 16 plaz da pernottar. La chamona è bagegiada en il grip e paucs pass avant l'isch vai ca. 1000 meters agrad enagiu tar il Limmernsee. La notg èsi inditgà da prender ina lampa da maun per in sin tualetta. Da la tualetta anora han ins dal reminent ina vista singulara.

Per star pli ditg cun uffants n'è questa tegia betg exnum da cussegliar.

Il davos stoi far mal insanua

Il Wienerli n'è anc betg tuchegia che nus cuntanschain il Lembra e surpassain ils cunfins da Glaruna. Uss hai num trair chommas. Da las 16.00 avain nus empustà il taxi. In'urelletta contemplain nus anc il Muot da Rubi e ponderain tgenins culms che stattan sanester spon il Muot. I sto esser ils Cavistrai. Davosen vesan els ora tut auter che da la Surselva anora. Ma uss èsi propi da laschar schular. Enten ir mintgatant ina egliada en la Val Frisal. Ella è uschè bella ch'ins po prest betg pli guardar. Ma forsa essan nus era simplamain unffis da trottar.

Il davos toc èsi bain adina il medem. Era sch'i va be engiu. Igl è anc ina tilada. I ranscha. La detta-pe dola. Quant lunsch èsi anc? Gliez less jau era savair...

Finalmain. Giu là. L'Alp Quadras! Las plumpas da las vatgas stgadainan. Ellas van en stavel. E nus duas cuntentas a chasa.

Differentas variantas da questa tura èn descrittas en ils cudeschs «Wanderungen zu Bergseen in der Schweiz» dal WerdVerlag, u en «Glarner Überschreitungen» da la chasa editura Rotpunkt. La charta Tödi 1193 mussa l'entira ruta dal Tierfed fin l'Alp Quader.



Nursas grischunas pasculeschan sin territori glarunais en l'Alp Nüschen.



La redacziun sin viadi spetga il taxi en l'Alp Quadras.



La chamona dal Muttsee ha plaz per settanta personas.



Il Limmernsee tschiffa aua d'in grond territori. Schizunt dal Klausen e dal pass da Pigniu vegn manà natiers aua.



Anc il fanadur noda tocca da glatsch sin il Muttsee. E suten vivan peschs.